

Reapertura di Academia Musical di Aruba

ORANJESTAD (AAN)-ASOMA conhuntamente cu Academia Musical di Aruba ta trahando intensamente pa e reapertura di e academia pa

dia dos di October 1989. Ta asina cu actualmente e academia tin 6 maestro cu lo bay duna lesnan di guitarra, piano, drums, bass, saxophone,

flauta, trompet y latin percussion. Pues tur instrumentonan di importancia pa por toca den hotelnan.

E motibo principal ta pa frena

e musiconan di exterior cu lo invadi Aruba ora tur e hotelnan nobo keda cla. Actualmente tin suficiente músicos pa yena tur vacatura cu por presenta pero pa futuro cercano esaki lo ta difícil.

E idea ta pa e alumnonan tin un preparacion musical basico caba y tin e deseo di toca den hotelnan. Normalmente un curso por dura 5 año pero si e persona ta tocando caba como amateur y tin un base, por ehempel por lesa musica un poco y conoce su instrumento, e ora e maestronan por yude yega na un nivel aceptable

dentro di un año pa dos año.

Esnan mas avanza lo por termina e curso promer cu e hotelnan nobo cuminsa habri. Ta e intencion di ASOMA y Academia Musical di Aruba pa busca tur musiconan Arubano cu ta bibando den exterior pa bin traha bek na nan pais. Y acaba tabata tin contacto cu varios cu ta biba na Hulanda.

Tin hopi cu tin e experiencia suficiente pa yuda e talentonan local y ora cu sa cu ta Arubianos ta tocando na e hotelnan por bisa cu e cultura-musical tin e oportunidad di sobrebibi.